



Լևոն Խեչոյան

Ոսկե ձկնիկը

Հայրս տասներորդ դասարանի շարադրությունների տետրերն էր ուղղում, Մելանը կանգնել էր սեղանի առաջ, մի ոտքը կարճ էր մյուս երեք ոտքերից, տակը՝ ծալծված թուղթ էր դրված, անընդհատ պնդում էր . «Գնանք խոսենք, գնանք խոսենք»:

Գրիչը դրեց, կիսաբաց պատուհանից լսեց-լսեց փողոցի աղմուկը, հետո ելավ տեղից:

Սկզբում չէին թողնում՝ ես էլ գնայի, քիչ անց անուշադիր եղան:

Մանուկը ծխելով՝ գունավոր գիրքն էր թերթում, հեռուստացույցն էլ միացրած էր:

Ասաց . «Մտքներիդ բան եք դրել, որ էսպես տնով-տեղով եք եկել»:

Մելանն ասաց . «Խոսելու ենք եկել: Գոնե մեզ պատմիր՝ ի՞նչ է կատարվել՝ խոսես կթեթեւանաս»: Ասաց . «Թող մնա ուրիշ անգամ, գնացեք քնելու՝ հիմա դրա ժամանակը չէ»: Մելանը՝ թե . «Դուրս է գալիս՝ մեզ չես վստահում, բերանդ չի բացվում՝ մի բառ ասես»: Հեռուստացույցը անջատեց:

Հայրս էլ էր պնդում, որ այնտեղ մի բան է պատահել, ինքն էլ չէր հասկանում՝ ինչո՞ւ է մեզանից թաքցնում: Ավելի համառ դարձյալ պնդում էր . «Ուրեմն՝ այդ ինչ բան էր կատարվածը, չէ՞ որ տեսել ես»:

Հատակին՝ ճերմակ, մեծ գլխով լուսամտովին էր վառվում, շհասնող լույսի ստվերոտ տեղից գիշերաթիթեռներ էին գալիս, խավոտ թեւերով թշուրոցով զարկվում էին տաքացած ապակուն:

Նորից ասաց . «Ոչինչ էլ չի կատարվել», որ ինքը ոչինչ էլ չի տեսել: Ասում էր . «Թող մնա, ավելի հարմար ժամանակ կխոսենք»:

Հեռուստացույցը միացրեց, իմ ներկա լինելը սրտովը չէր՝ ասաց . «Ձեն՝ ձենի տվել, եկել եք, էն էրեխուն ինչի՞ եք բերել»:

Բայց ես գիտեի, որ արդեն մեծ էի, թաքուն փորձել՝ երեք օր բերանս ոչ հաց, ոչ ջուր էի դրել, դիմացել էի: Լավ գիտեի՝ եթե ուզեի, էլի կդիմանայի:

Պատրաստվում էի՝ հաջորդ գնացողների հետ ես էլ ճանապարհ կելնեի, այնտեղ ով էլ դիմավորեր, ում էլ տեսնեի, վստահ էի՝ ինձ ոչինչ էլ չէր պատահի:

Նա հունիս ամսին էր կամավորական ջոկատների հետ գնացել . երեք օր էր մնացել, վերադարձել, այլեւս ոչ ոքի հետ չէր խոսում:

Հաջորդ գիշերը հայրս ու Մելանը էլ չգնացին՝ նրա երեկվա լուռության համար: Ոնց որ վոնդելու պես դուրս էր արել իր սենյակից՝ վեց օր էլ ամեն գիշեր ուզում էին դարձյալ գնալ՝ ձգձգում էին:

Առավոտից իրիկուն անընդհատ պառկած էր լինում մահճակալին, երբեմն էլ ամբողջ օրը քայլում էր քաղաքի փողոցներով . ներքեի թաղամասերից մեկում հայրենադարձները սրճարան ունեին՝ միշտ լավ երաժշտություն էր լինում, մեկ-մեկ էլ նրանց մոտ էր գնում, երբեմն էլ՝ խոհանոցում ճաշելիս դադարեցնում էր ուտելը, քունքն էր տրորում՝ կարծես այնտեղ մի բան լիներ ընկած:

Չորս անգամ փորձել էի մտնել հայացքի մեջ, աչքերի տագնապի վրա չէի գնում, հայրս պատմել էր, որ նրանցից էլ հեռու՝ ներսի մեջ, մի բան կա, ուզում էի՝ այդ մի բանը գտնել: Չորս անգամն էլ մեր հայացքները տարբեր դիրքերից սեւեռված իրար էին նայել, կարծես մեզանից մեկը շոշիկի նման գլխիվայր՝ առաստաղից էր կախված, թարս ու շիտակ էինք միմյանց տեսնում:

Ութերորդ օրը երեկոյան մի ակնթարթում մահացավ՝ թույն էր խմել:

Շեռտ միանգամից՝ հարեւանները, բժիշկները, բարեկամները, միլիցիոներները, լցվել էին շոգի մեջ . բոլորով միասին խոսում էին, բոլորով միասին լացում . Սկզբում՝ թույլ, հետո քանի գնաց՝ սաստկացող գվվոց սկսեց արձակել տունը՝ պատերով, շատերը ձայնը չլսելու համար տեղներն էին փոխում՝ չորրորդ հարկից անընդհատ բակ իջնել-ելնելով:

Դրանից էլ չէի վախեցել՝ ոսկորներս լցվեին մտով, մի գիշեր կփախչեի տանից, հաջորդ գնացողների հետ ես էլ հեռավոր ճամփաներ կելնեի:

Արդեն կարողանում էի՝ զարկող փոթորիկի տակ անվհաստ, նույն դիրքով, ականջս օտար եզերքի ձայներին, գիշերվա մեջ մինչեւ լուսաբաց անծպտուն, անշշուկ նստել:

Գիտեի՝ ճանապարհներին ում հետ էլ հանդիպեի, ինձ ոչինչ էլ չէր պատահի:

Երբ թաղումից վերադարձանք, հորս այդ ժամանակ դեռ կաթվածը չէր խփել: Մելանը ինձ վրա գայրացավ: Միջանցքի սեղանին դրված ակվարիումի աբսենքի կանաչին զարկող ջրի մեջ լողացող ոսկե ձկնիկին գետն էի թողել, ավելի գայրացավ, երբ ասացի . «Նո չէր կարելի Մանուկի հոգին ակվարիումում պահել»:

Ասաց . «Ապուշ, չհամարձակվես ինձ Մել ասել»: Նրա հետ այնքան մտերիմ էի, որ դեռ ցածր դասարաններից, անունը միշտ, ամենալավ ընկերներիս՝ թաղի տղաների անվան նմանությամբ կրճատում՝ «Մել», երբեմն՝ «Մելո», «Մե», երբեմն էլ հորս առողջանությանը նմանեցնելով՝ «Մելանիա» էի ասում:

Չնայած՝ տղամարդկային անուններով կոչելուն, խոսակցական բարձր ձայնից շփոթվող՝ ընդգծված կանացի բնավորություն ուներ: Դեղձանիկի նման երգը բերանի մեջ էր պահում, կար անելիս, հարեւան սենյակից ոտքի «Պողոլսկ» մեքենայի միալար թփթփոցի հետ, անընդհատ օրորոցայինի խաղաղեցնող մեղեդիներ էին լսվում:

Գերեզմանատնից վերադառնալուց հետո, երբ օրվա լույսը սկսել էր գույնը փոխել, արեւմուտքի կողմից ստվերները մեծ գետի վրայով անցնում, քաղաք էին

լցվում՝ հորս կաթված էր խփել:

Մայրս էլ բժիշկների հետ՝ շտապ օգնության մեքենայով հիվանդանոց տարան:

Մի ամիս անցավ, երկու քրտնած սանիտարները ետ բերեցին, պատգարակը թեք պահեցին, կոճղի նման անշարժ մարմինը գլորվեց մահճակալին . գնացին:

Լեզուն բամբակի պես ճերմակել, խոշորացել էր, բերանի մեջ չէր տեղավորվում, ոչ էլ խոսք էր կարողանում ասել: Մեզ վրա բռնած, կլորացած՝ ճենապակու պես ճերմակած սպիտակուցներով աչքերի անթարթ, միապաղաղ հայացքից էլ պարզ չէր՝ մեր ասածները լսում կամ թե հասկանում է:

Չենց այդ օրն էլ նրան մեղադրեց Մանուկի մահվան համար:

Ասում էր . «Եթե լավ հայր լինեիր, եթե տունդ այդքան անպաշտպան չլիներ, ինչպե՞ս էր փորձանքը մոտենալու, մի՞թե քո տղան այդքան հեռու կգնար՝ նման անորոշ ճանապարհ անցնել բոլորին չի տրված, ասում էր, լավ, վերադարձավ, հետո թող թույլ չլինեիր, շքեղ մեքենայի, որեւէ հարստության անուն տալով՝ կապելիր աշխարհին, պահպանելիր մեր առաջնեկին»:

Նորից քաղաքային թատրոնից կնոջ անուն էր տալիս՝ համարելով հորս սիրուհին:

Ուշադրությունս շեղելու համար մեխին էի նայում, մահճակալից քիչ վերել՝ մերկ պատի վրա, մեխ կար:

Չնայած՝ թատրոնի պետականի կոչում ունենալուն, դերասանները՝ բոլորն էլ սիրողներ էին: Հայրս, հատկապես, Շեքսպիրի բեմադրություններում էր նախընտրում հանդես գալ: Նա՝ սիրուհի ասելով, դերակատար գեղեցիկ կանացից մեկին նկատի ուներ:

Վերահաս դժբախտության պատճառն էլ՝ հենց դերասանուհու հետ մեր ընտանիքի նկատմամբ գործած մեղքն էր համարում:

Հայրս ուշաթափվեց, երեք ժամ ուշաթափված մնաց:

Դրանից էլ չէի կոտրվել, դարձյալ ոչ մի բան չէր վախեցնում՝ ճանապարհ դուրս գալու գիշերվան էի սպասում, արդեն կարող էի օրերով քայլել լեռնային սառնամանիքների, անստվեր տափաստանների տոթի միջով, գիտեի՝ ծնկներս կդիմանային, ընդառաջ կգնայի դիմավորողին, ով էլ լիներ, կհանդիպեի նրա հետ ու ինձ ոչինչ էլ չէր պատահի:

Հորս ուշաթափությունից հետո նրան՝ ոչ կրճատ անուններով, ոչ էլ «մայրիկ» էի կարողանում ասել: Եթե խոսելու համար ցանկանում էի դիմել՝ այնքան էի սպասում, մինչև շրջվեր կամ մեր հայացքները հանդիպեին:

Հետո սկսեց խմել . մտնում էր Մանուկի սենյակը, երկար մնում:

Անընդհատ, ետուտառաջ տալով, դիտում էր տարբեր տարիների ընտանեկան տեսախցիկով նրան նկարահանած տեսաֆիլմերը: Կադրը կանգնեցնում էր ծոծրակին:

Դարձյալ խնամձ էր, կծվահամ ալկոհոլի հոտը ծածկելու համար թունդ օժանելիք էր օգտագործում, երբեմն անհնար էր լինում նրա հետ նույն տեղում գտնվել:

Հարցրեց . «Ինչի՞ց էր ծոծրակի ճանկովածքը»:

Չէր կարողանում հասկանալ առաջանալու պատճառը:

Ասում էր . «Եթե քերծվածքը թույնի հետեւանքով լիներ, այդ դեպքում պիտի ընկներ, քունքը, ճակատը կամ այտը վնասեր, ասում էր, մեր պարագայում թույնն այնքան ուժեղ էր եղել, որ ակնթարթագարկ մահ էր իջել, չէր էլ հասցրել ընկնել՝ ոնց աթոռին նստած էր եղել, այդպես էլ մնացել էր, ասում էր, կարող է՝ դիակը վերցնելիս շտապ օգնու թյան բժիշկները կամ միլիցիոներները գործիքներով կամ եղունգով են անզգույշ խփել»:

Ենթադրությունները անհավանական դարձան, երբ խոսեց այն օրվա հերթապահ՝ շտապ օգնության բժիշկի, միլիցիոների հետ: Փոր ձա գետի նկարած լուսանկարն էին ցույց տվել՝ ծոծրակին եղունգի կամ ճանկի հետք չէր եղել:

Իսկ ինձ դարձյալ ոչ մի բան չէր վախեցնում, փախուստի ժամին էի սպասում:
Մթան մեջ բաց պատուհանից դեռ լսվում էր քաղաքի աղմուկը, սայլերը,
ուշացումով, դաշտից սպիտակակապտավուն շեղ ջե բով կաղամբագլուխներ էին
տեղափոխում:

Այսօր կեսգիշերին գնացողների հետ ճանապարհ էի ելնելու` լուսաբացին տանից
արդեն այնքան հեռացած կլինեի, որ անգամ, արեւա ծագին քաղաքի կայարան
մտած շոգեքարշի արձակած սուլոցը չէի լսի թիկունքից: